

STEELBAND

E musica cu nos ta tende durante parada di Carnaval den e ultimo añanan ta produci pa bandanan cu equiponan sofisticada cu ta zona pa distancianan largo. Pero den añanan 50 te 65 esaki tabata diferente. Den e temporada ey e "steelband" tabata loke a domina Carnaval.

E steeldrum cu a nace den e decada 40 ta originalmente di Trinidad. Poco-poco e instrumento aki a plama den henter area di Caribe. Aruba tambe a tuma e instrumento aki como uno usa den paradanan di su Carnaval.

E steeldrum ta traha for di un simpel bari di azeta cu e gruponan tabata haya for di e refineria di e tempo ey, esta Lago.

Primeramente nan tabata bati e top di e bari manda esaki aden. Despues nan tabata pinta e patronchi di e tononan na e banda ariba y nan ta bati cantidad di hoyonan chikito cu un plek chikito riba e liña pinta. E hoyonan aki ta separa e tononan di cada seccion. Awor nan mester corta e bari na e tamaño desea. Por ehempel un 'first pan' ta wordo corta mas o menos 12 cm bao di e rand. Un 'gumbler' na 22 cm, e 'cello' ta mas o menos 2/3 pa 3/4 parti di e bari y pa e 'base' nan ta usa e bari completo, pero sin bom.

Despues di a corta e bari nan ta bati cada seccion afor atrobe y nan ta keinte riba un candela pa mesora despues nan basha awa friu aden. Esaki ta pa haci e staal duro.

Por ultimo nan ta bai stem e steeldrum door di keda bati cada seccion poco-poco cu un martiu fini.

Pa toca e steeldrum nan ta haci uso di palonan cu un bala di rubber na punta of un repi di rubber (chup) lora na e punta.

Ultimo temponan nan ta usa un stokje di aluminio cu e rubber na e punta.

Antes un steelband tabata baha na pia den parada. Nan tabata colga e drumnan chikito cu un faha rond di nan nek. E drumnan grandi tabata bai riba wiel den parada. Ta despues nan a cuminsa traha trailer di tubo cu un lugar fiho pa cada drum di moda cu e tocador no mester carga nada.

Un steelband na pia tin 6 diferente drum y cada un ta produci un otro zonido. Un steel-orchestra cu ta toca riba un stage tin un drum extra, e "double first pan".


E "first pan" di un steelband cu tin por lo menos 25 diferente tono semper ta bai na cabes di e grupo, e drum aki ta saca e melodia. E "second pan, gumbler, cello, base y boom" ta compaña. Hunto nan ta forma e gran musica di




Second pan



gumbler



cello




Carnaval cu lastimamente a caba hopi durante e ultimo añanan. Sinembargo e musica tipico di e Carnaval den Caribe ta keda e musica di STEELBAND! :)



Chabalito

Number 5 - Año XIII



3.00
(incl. B.B.O.)